

四庫全書

集部

欽定四庫全書

集部

本堂集卷八十四至八十七

詳校官庶吉士 臣 李傳熊

主事 臣 呂雲棟覆勘

總校官進士 臣 朱鈐

校對官編修 臣 嚴福

謄錄監生 臣 金彥茵

欽定四庫全書

本堂集卷八十四

宋 陳著 撰

婚劄

代溥姪再缺期王氏劄

某伏以寒到嚴時春有動處恭惟某官養高珂里神示  
介扶台候動止萬福某雖未揖長松古柏之操天與黃  
緣嫁娶圖中新盟既定此心有欲言者可恃以瀆聽某

之舍姪孫某獲與令姪女為姻昨者請期命龜食墨實  
在嗣春之四日乙丑暨奉答緘尚遲報可某家粗守詩  
書之傳所以眩流俗者既非所望令弟提幹親家於凡  
百亦既真情相示何獨於迎日而未能特達從欲耶是  
用洵鳴此悃舍姪夫婦老矣待其相蘋繁佐菽水者甚  
急而男女亦當綢繆束楚為鑿淵可陵也石可泐也君  
子之言無易也某茲其亮之告弗過有謙遜元卜之吉駟  
車戒道某三肅以候尺狀厓潦不盡願言仰祈台照

代陳策為子納采劄

某伏以薄雨生潤新陰有香恭惟親家某官袖手名鞭  
夷神書屋天神介相台候動止萬福某僭屈墨卿仰干  
籤史某惟寶麓之陰福星合焉何物寒暑敢闖其域茵  
鼎之禱奚庸贅某老矣猶能就丹霞峯頂遠引清風時  
自拂濯獨以門間半面一揖為欠乃有今日預為之喜  
某恭惟某官學博而約行方而通望而知其為沂國之  
雲來也蓬萊觀梧桐掖皆其分內事顧方欲與二松盤

薄而與雲俱歸又在南山之下矣顏波滔滔底柱屹屹  
某欽敬欽敬某家居深谷門甚寒灰舍姪孫某之次子  
某雖欲讀書猶未知趣秋水曹丈乃曲為之地輒使請  
婚於名閥高明何見遽肯屑紅絲之愛印赤繩之緣古  
道相從自今日始某實過望某婚姻有禮納采其初也  
明幣雙釵菲以將意為物不腆亦曰簡則敬而已惟台  
慈涵宥而容納焉某遯喬仙之宮集崑閩之春風塵不  
到日月自長或有委驅拱聽頌曉

代單祥卿納采王氏劄

某伏以夏五之月晴多於陰恭惟親家某官眼空塵寰  
身燕珂曲元粹所宅神明其扶台候動止萬福某肅飭  
贄函越柰涓典尚祈委鑒焉某惟風綢珍簞冰椀蔗漿  
非所以瀆有道之聽某敢畧某家萬山中出而與鄉人  
士交遡古君子之門欲從下風而進未遑也機緣之開  
乃在今日某為之鼓舞某恭惟某官學博而約行和而  
清秦火自炎胷中之書不燼顏卷雖陋天下之樂何加

鄉有老成之典刑人知故家之文獻今為何日誰如此  
賢悠悠我思鼓河汾南風之澡皓皓其白傲雪山西嶺  
之松某非佞某婚姻重事也門戶以耦婚男姻女以時  
尚矣今某之家氏名如水奚敢攀袞閣之後而某姪某  
鬚髯已戟奚敢過綠幕之前道眼鏡懸古心山立不曰  
愛女必求良姻顧聽因親之言遽垂可妻之諾百世斯  
好一旦而諧何如其榮何如其幸某納采之初以簡為  
敬將之朋幣副以雙釵告亮其真勿訝其菲某矯首玉



樓高明瑤林森邃一和所萃多福攸同或有委驅拱俟  
頌曉

代汪甥回舒景仲螟蛉劄

某伏以春脚一來雨意便好恭惟親家某官養老成望  
與造物游台候動止萬福某更不復上茵鼎之祝伏惟  
鑒察某幸生樾蔭之下與有葭倚之榮既見未降此愧  
贖機緣有在今乃得以尺素通姓名是亦當識荊州一  
面也某恭惟某官生來逸氣老去古心感桑梓之風塵

何如避世有山林之雲月足以為家時時杖履之往來  
在在樵漁之邂逅不圖今日而見斯人為田園而歸翻  
笑未通之靖節惟墳墓之守甘如自在之少游某非佞  
某過蒙高見欲抱舍姪某次子以為家之謀而效類我  
之祝燕泥小草恐難譜於芝蘭雀巢之雛豈足班於鸞  
鳳第便翻其承命况左右其贊言有不得辭勉于曰唯  
禮幣寵錫物意謙渠僕僕拜嘉變變增愧某仰遊珠纒  
均擁川社雙溪有委九頓願承

代戴時芳為弟聘王氏劄

某伏以荷展翠鈿麥齊金穎恭惟親家某官吟杖寄閒  
聘輪須寵天壽斯道台候動止萬福某飭管翰儼冠裳  
贄初敬於主籤史首祈鑒宥某竊扮陰睽葭譜於茲有  
年鷗踪鹿跡日與漁樵相爾汝曾未得接待半席之雅  
望茂林修竹深處亭古風高引領何及某栖栖門地猶  
未減雪溪之寒耳外此無足為鄉黨稱機緣天來汪表  
僭求賢令女小娘子為姪孫某議姻不惟獲叨倚玉之

榮而王戴尋盟又成一段佳話夫豈偶然且審誼高薄  
雲渺流俗畧繁文相求以氣已備訂金語心自慶何幸  
何幸某朋幣雙釵庸贄初盟翹首竅命某晉越申問蓬萊  
仙山眷玉寶聚欽想慶源川衍和脈春融有委之來聞  
命則拜

代再三十兄為興乙姪聘劄

某伏以律賓夏琯薰自南絃恭惟親家某官厚德鎮浮  
英名增重顯閔森護台候動止萬福某謙淪心澡神奏

記籤史伏祈淵鑒某燕儀叙敬龜列具嚴邇辰何似之  
清不敢復以為瀆諒惟體道燕居寒燠聽令動靜之間  
固與福會尚冀試葛須輕進羞宜美相時崇衛前輅異  
渥某忱禱某晚景無堪竊庇桑梓有懷高風每以未遂  
覩鳳為欠岳峻杓明徒僅起敬仰惟某官負雪山冰壑  
之資蘊玉海珠淵之學倚須秋霄騰鶚陸續聯榮早快  
一鞭得意亨翥某束筆以俟某僭躡披稟日者天假黃  
會俾某姪孫某得議婚名閥某門戶冰冷奚敢作扳援

想然私竊自謂叨倚玉之榮者非一日而青翼備言令  
女小娘子愛篤外家隨倚母慈乃知秀挺蘭閨宜有林  
下風味况復姻婭稠重夙有締杏園之好庸敢以是為  
請但提孩相知姑欲其漸女之歸而特緩咸男之下倘  
蒙不以齊大叱去特賜俞允豈勝榮幸不腆菲儀別楮  
申納仰丐台察某敬問蓬瀛邃府星壁仙裾共想序對  
清和福膺穰簡霞峯豈無可受鞭策者承命為寵

代弟回馮定女笄

某竊以一旬春在萬綠陰濃恭惟某官善培遠器尋登  
要津清寧翊扶台候起居萬福某蒙恩浮岳懷慊臨淵  
俯頽手箋仰塵掌記尚乞鹽梅翠釜金玉香篝前輅燕  
休下行蟻悃某敬惟親家挹泉溪之清孕日峯之秀挺  
忠臣之節唐世家聲播名賢之風漢朝芳譜以功名而  
自任充學問於所行夫何自珍斯文退養厥志或者拜  
自天之寵有以被不日之榮某非佞某三生多幸累葉  
聯姻豈圖又一番桃李之新乃使續百載葭莩之舊冰

月之緣既定第慚無柳絮因風之吟節序之更如流應  
有貽荷花開晚之請蓋叢以蓬居多事可恃者蘭臭同  
心臺餽鼎采瀛珍隨餉將其厚意恰逢牡丹結局之時  
報我佳期敢負梅粉趣裝之約有先龜吉肯後寵承某  
翹想五雲樓中三神山上欽惟星聚雍穆時介簡穰可  
効力綿敢辭足繭

代季念五姪回王巴山定女笱

某伏以雪意之外天心有初恭惟親家山林自珍里閨



是式神不徹衛尊候動止萬福某敬飭子墨仰酬主書  
惟奎壁委光焉某萬竹深處三槐庭中修勁之風溫淑  
之氣薰蒸融液皆福所都寒暑之祝特贅耳某載惟親  
家藏用於密得趣之清望彥方廬號其鄉曰君子耕東  
皋野稱斯人曰先生紛蕭艾之芳叢善松柏之獨秀舉  
扇自障不必受西塵之飛鼓瑟以娛當有感南風之操  
某非佞某冰門也而倚玉稠矣惟是季方堯叟既為吾  
門之甥而其令某以彌甥又與某姪孫女某為姻杏村

繪畫朱陳不得專美世方交皇皇赫赫高誼幸獨與淡  
泊鄉尋盟草木相命實獲我心不腆回幣聊以寓禮勿  
訝其簡某僭易申詞喬仙瑤母之集樂景春盍閒中日  
長丹山有委願聽頌曉

代族弟觀回蔣定女劄

某伏以雨裝秋好風送涼新恭惟親家鄉之善人國之  
大老神示僕介台候動止萬福某潔泓滌頴具酬擯於  
五雲閣下某切惟君子一身起居服食曲禮鄉黨諸書

講之既熟莊叟養生之論黃庭內景之祝概用雜去某  
伯氏有聯榜之盟賤生忝同甲之好於今象賢托瓜葛  
之姻于里閨席扮榆之蔭舉斯四者契誼之篤雖金石  
有不能渝詎謂今日又使之因親而親抑何其幸自茲  
胥晤之期當不負少陵動如參與商之句矣某載惟親  
家齒尊德劭氣溢體充秋滿桂闡喚起香名之舊風清  
竹徑頌形美真之新時方滔滔公其卓卓永錫難老幸  
偕樂於藻芹寒然後知尚相期於松柏毋曰隱居而自

適行觀大器之晚成掇梁灝之科名維其時矣展太公  
之事業跂予望之某非佞某蛙坎門戶鮒枯生理齊大  
鄭小豈其儔焉令郎下訪欲以某姪女與令姪孫議締  
正耦或者夤緣有在不容辭揆以難嫁之家焉敢扳附  
然嫁女必勝吾家又未免世俗之見竹筍練裳有昔人  
之遺躅荷令姪親家高誼特達首承肯可令郎之言在  
耳也某恃以無恐某交婚伊叔過勤贄禮極佩榮寵薄  
有回儀非所以報瓊倘不賜訝幸甚某仰睇十二樓之

媿均膺九五疇之福剡中有委不敢以耄辭

代董時遷定蔣氏劄

某揆辰紅繡園林綠茸郊野恭惟親家養譽里閭怡神  
丘壑百神森衛尊候起居納福某澤毫雪繭奏記於典  
籤氏惠徽鑒在某切惟箕峯扈前修嶺擁後君子長者  
攸宅焉况對此春和景明傍花隨柳政得昔人前川之  
樂何物陰陽或敢窺闖鼎茵等祝奚容進熟某獲睽越  
蔭同采泮芹第風南枝北不得以時簪盍高山仰止豈

不夙夜詎意斯今以蒹葭而倚玉樹非幸而何某仰惟  
親家桂種階庭以清門徑者英集上共推齒德之素尊  
安樂窩中最羨風塵之不到滔滔彼俗卓卓此賢但經  
濟之有需恐老成之難遜榜登龍虎年將望魁譜之占  
夢叶熊羆時盍應帥垣之聘某拭目某未緒卑微不强  
人意華宗赫奕藉在人耳相望不翅霄壤有如英嗣令  
女蘭姿婉婉葆育深閨自宜相攸佳偶而某男某既匪  
瓊環瑜珥妻姪汝朝輒效柯議俾綴姻盟高明何見遽

肯肩紅絲之愛印赤繩之緣百年之好一旦而諧其實  
過望某問名莫重初敬非幣帛則不交也非然贄儀介  
於副楮是特藉茅之遺意惟忠信是采某睇三神山遡  
五雲閣霞裾縹緲紫氣繽紛剡溪委驅執鞭以從

代姪孫霖為子灼納采盧氏劄

某伏以清晨挾潤綠陰吹香恭惟親家書林養恬珂里  
歸重神示森相台候起居多福某敬戒墨卿仰酬籤史  
某竊惟三神山上萬卷樓中有物護持與道遊戲尊

生之禱奚庸贅 某繇奉川之鄞水清波百里素風一  
家舊相知者良稠有未見者猶久或其在今日也 某  
官清而自修靜而無競遊堂之後燃文華其九傳鄞城  
之西傲典刑之獨立旦評所屬晚節彌堅草木榮華之  
風非所知也芹藻芳潔之地不亦樂乎某非佞 某冰  
門誰偶月店我緣男灼既冠未婚令女方笄於室有來  
媒斧可謂友琴慚非潤玉之姿顧寵訂金之諾且欲引  
之自近庶可教之成終樓上和聲或可諧於鳴鳳門間



喜色恐莫副於乘龍懼益以增幸過於望岡頭盧雖為  
甲族於義則高拊中陳當為世姻自今其始幸之至也  
拜而承之 某菲甚聘儀介於副楮所恃清風之扇庶  
無流俗之嫌特與斥留豈勝忻感 某仰止寶集遽在  
瑤臺一和所都多福如海

代王得淦為子納采林氏劄

某伏以一雨連日六月如秋恭惟親家養望書林增重  
珂曲神示森相台候動止納福某更不贅尊生之禱仰

祈涵宥 某牽聯瓜葛披拂芝蘭未見猶既見也機緣  
之來乃有今日當何如其幸喜某恭惟某官典刑老成  
文學蘊藉上橋衣冠之裔濟美月評東甬衿佩之區助  
成風教謂時名之若浼以古道而自將桃李爭春酷愛  
藻芹之薄采松柏耐晚笑看蒲柳之易衰亦賢已哉可  
敬也已 某自分冰門敢睇雲閣夤緣或到形迹自忘  
有如令女蕙性芳香男某乳口猶臭而親家主盟益堅  
媒氏傳言孔力此皆天作之合是豈人謀所能此時之

男角女羈何如同隊他日之婦隨夫唱方責成人敢徹  
裏言以定夙約當繼今而有請殆之子之于歸 某僭  
越拜問云云

代族孫文焞答唐氏聘女劄

某維時多雨饑夏已涼迎秋恭惟某官安適家林靖鎮  
里曲明示森相台候動止納福某請涓子墨仰復主書  
某恭惟蔡峯峻極崑閬遙連神仙所遊風月自別尊  
生之禱奚容贅瀆某睇五雲之下距一舍而西亦已相

聞未降既見就知有緣乃在今日也 某恭惟親家言  
行相顧典刑則優池有濂溪之蓮與君子友山宜盤谷  
之稼真隱者居此外又何求哉其中足以樂矣桃李春  
事付榮華於飄風松柏歲寒儼老蒼其傲世某非佞  
某聽冰上語說月下緣以令姪黃卷早親培植桐之秀  
質而某女綠窻自分抱蘭蕙之幽姿若曰好述之勤且  
言筮從之吉殆天所合於我莫辭竹筍為裝當不嫌於  
古道杏村入畫須相好於新婚敢繳清風以洗流俗某

茲承嘉命式定初盟納采有嚴拜辱惟謹薄甚回篚介  
於別藤 某遙溯星問益屆川祉一有委戒三肅願承  
代族孫檜納采劉氏劄

某伏以十月為陽一晴逗暖恭惟親家書林養望里曲  
擅評神示相之台候動止多福某僭憑子墨仰竇主書  
某謂嵩溪之涑源流則一月店之緣脈絡尤多孰謂  
今日夤緣未涯也喜欲越舞 某恭惟某官宦緒傳芳  
儒冠集舊襟懷洒落譜風月而有餘典刑老成家山林

而自重我其卓卓彼哉滔滔某非佞某一冷如水多緣  
倚玉茲審令姪女素閑姆訓許嫁方嚴而某季六舍姪  
之子檜粗守家傳好速自急既無世俗形骸之索况有  
舅甥心腹之通百世之盟片言而定成於不日于六禮  
乎何拘合者其天乃一門之至幸 某問名茲昉居簡  
而行介諸副箋愧甚非禮就拜問蓬壺仙媿川祉攸同  
代族姪孫為子梓熾納采張氏笱

某伏以露節才過秋光最好恭惟親家家傳文獻鄉有

典刑明示森映台候動止多福某敬飭子墨仰溷主書  
不敢洵贅尊生長語首祈台照某聯桑梓之姻忝葭莩  
之譜為日已久披雲未諧今為何時月下老又以黃緣  
相屬何幸如之喜之欲舞 某恭惟某人學無時裝行  
為世表正元衣冠之後依然古風義興松菊之門樂有  
餘地彼滔滔其方競此卓卓其自高束帛蒲輪固已付  
之炊枕貉裘氈帽焉能免於角巾某非佞 某不揆冰寒  
輒徼玉倚有如今女閨闈婉婉如蘭斯芳而某子某筆

硯荒嬉既木而納本來非偶何敢好述惟裏言之助孔  
勤而下采之情無間况容出贅尤見篤親百世絲蘿又  
成盟於今日一家桃李已鼓舞于春風感烈良深敷宣  
罔既 某僭易某物聊旌納采大愧非儀倘辱容留豈  
勝榮幸就拜問蓬壺燕聚茨福駢臻或有委驅拱聽戒  
曉

代姪孫楠聘屠氏請期劄

某維時歲晚方雪春香在梅恭惟某人林泉養高明示



翼德台候動止多福 某家與門牆只隔南山實朱陳  
一村也世譜姻聯道誼顏面之接良狎茲好又新當與  
桃李春風話舊矣 某恭惟親家家譜擅芳鄉評推老  
濯纓兩溪之口波濤不驚倚袖萬竹之陰風月自足  
當今之日得此者誰起居無時維適之安何如李愿曲  
直將質或至而退當為彥方某非佞 某牽聯夤緣昨  
以舍姪孫楠議姻於令姪女荷不遺菲葑既諧納采男  
女各欲及時敢以迎請從簡行速亦古人所許而高誼

亮之卜吉辛卯諾以訂金薄禮將誠介於右楮萬望容  
留 某僭易拜問星珠月璧之集福海壽山之同嵩溪  
有委九頓願承

本堂集卷八十四

欽定四庫全書

本堂集卷八十五

宋 陳著 撰

婚劄

代陳回竺劄

某維時一晴借煖萬物如春恭惟親家閒鄉課鶴壽境  
盟龜穹示翼扶台候動止納福某潔泓滌穎輒修竿牘  
仰酬籤史先辱之寵 某竊以金庭五峯之秀遶溪一

水之清仁人長者之居左右焉動靜語默何福不隨黃  
庭衛生之禱奚容贅 某嘗登陳公嶺溯竺君之門清  
風凜凜可望不可即惟誦未見君子憂心冲冲之詩而  
已若夫賤氏則在桃李譜中亦既有日 某載惟某人  
雪月襟度山岳精神芝蘭靜而自芳世塵不染松柏老而  
益壯歲寒後知倚歟斯人卓乎古道藏乎密也有時養  
蕙品之恬行或使之不日聽蒲輪之召某非佞某蛙坎  
戶門鮒枯生理崔盧之譜所不敢聞梁孟之盟或者相

契令姪孫姑姪間欲令小女與令弟議締室家葭玉重  
新又是一番佳話但小女拙醜百露四壁蕭然恐誤箕  
帚之奉而令姪孫必欲強其從不容固辭姑聽蚩緣謾  
爾過承倘肝胆相照庶乎其可也 某贅儀甚腆拜命  
為榮回篚菲薄尚望情亮 某敬問三神山上五雲樓  
中綠英福華山增川至里中有委九頓願承

代求彰叔回朱益仲劄

某伏以花日春明蘭風泛午恭惟親家懷玉需時鳴珂

積望后皇森相台候動止萬福某潔蠲子墨遡瀆司籤  
仰祈委鑒 某惟蘭臺英弭蓬萊旆揮山君先後雲仙  
導扶醉海吟哦楊柳何適非暢某不敢贅茵鼎祝 某  
竊扮榆陰通葭蓼譜遲遲半面積結寸心玉繩橫空辨  
香永夜 某恭惟某人學問玉海文章錦江五鳳樓成  
一鷄表上醉月燈之舫展雲翮之程券內功名斗南聲  
價願少淹於雋軌將厚養於宏材此造物心為遠業地  
某非佞 某門寒如灰望賒倚玉舍姪某有女第求鴻

光之偶敢締崔盧之盟辱枉雲裾載披月籍謂姪婦托  
在內表而令似屑以下婚瑟縮自量辭避者久恐終違  
親親之篤眷遂不覺唯唯而敬承三生夤緣一味慚覲  
某俄聽青翼之音拱拜素魚之牘詞情溫縟盟好綢  
繆寵以鱗番貴之雁幣光四浮於圭竇禮百倍於玉臺  
登嘉以還感榮無量不腆回篚虔載副藤倘辱容留是  
又過望 某僭易拜問三神山上五雲樓中月璧星珠  
霞裾風袂內外均燕福祿攸同凡有驅役拱候頒示

代斗門王定榆林陳劄

某即辰中和雨際花木生香恭惟親家鳩杖盤旋燕居  
豈弟台候動膺福祉某敬雪穎澤泓三肅貢書於下執  
事切祈采矚 某惟丹山之南雷峯之北皆神仙闕伯

之所都物無不靈人無不壽而耆龐福艾尤集於守道  
君子自宜與廣成齊齒希夷拍肩區區養生之祝抑末  
矣 某惟親家稟氣之和得道之純胸中萬卷吐為漢  
庭三策取青紫妙年真如拾芥易調羹秉軸謂在駸夫



何儒冠有誤歸老菟裘優游恬適以詩書自澤於是年  
愈高而德邵旦評推讓誰出公右今泰亨嘉會旁求俊  
彥徵文獻於東魯則申公伏叟必應時需某為後學慶  
某壤地相聯溪山相繞縹緲片雲勢同隔凡每於杖  
筇曳屨以遂識荆之願天其兀我跬步莫前惟有中心  
藏之而已猶思曩日戚故琴劍逗遛平湖俾諸子姪執  
經受業得所矜式某於時雖處竹林與有光焉今舍姪  
子吉與令姪孫仲學學士又在邢侯譚公之列欲以第

三子某求姻於仲學之女况執柯匪異伊人兄弟甥舅  
一言纔及遂成膠漆禮不可虛拘微物將情具於副楮  
某黃緣既叶仰慕彌深其敢不承寶眷春祺之間著  
則近乎謾某雖老難強履凡百驅役當坐令子姪輩導  
承

餽送小劄

餽姪氏生日

某拜覆姪氏太安人尊前某茲者恭審右悅書辰西瑤

宴晚九五福曰壽早從夫子之心培八十耄而期晚稱  
兒郎之色養歡雷既合暑月自涼某忝在甥聯幸隨賓  
履僭易某物敬進賀筵之末少見獻芹之忱倘賜容留  
豈勝榮感

答董霆

某老矣無能矣遑記垂弧歌之故歎之乃塵度曲益重  
蓼莪之感况增離黍之悲如此為懷何以拜辱謹錄副  
而珍襲用卷還於錦機

答董月嶠寬仁餽生日

乾坤如此遑記蓬矢之辰日月易流愈懷蓼莪之痛胡  
眷心之有軫而厚餽之盈奩及誦味言滂沾慚汗况諸  
子方茲更病而老驅蕭然抱憂用就使以卷還恃知我  
而免訝其為忱感與拜賜均初非飾辭敢祈原照

答董帥幹元龍惠物生日

某惶恐端拜申稟帥幹侍除尊眷契執事某生不辰忽  
年華之又晚里仁為美乃夙眷之有加賁之寶緘豐之

珍餽粉珍以滑其穀腹羶根以踏其菜園賜不敢辭既  
登嘉而僕僕贈何以報但伏楮而夔夔敬用稟酬尚圖  
面謝

答趙景文教授必昌餽生日

某我生之初尚無為安知世變君子之愛也以德胡循  
時情特當初度之辰乃有不規之頌况乎厚意加以多  
儀珍奩與珠喜而俱垂玉粉并彘鮮而雙美皆非所稱  
又不敢辭拜而登嘉感不盖愧

答范景山湘餽生日

某揆于初度非止蓼莪之思逢此百罹更深黍離之歎  
胡為范叔不忘陳人特枉溪藤之緘為置湯餅之料海  
鱈聯甲江鯊駢頭絜品珍其既并淒瓦釜其曷稱重於  
方命拜而登嘉感當何如愧又倍矣

餽內弟貝端父斗紀築室

某悚息狀白某官某茲審龜建華第虹騰畫梁舍城南  
之居而雲南不忘乎舊納亭裏之景于門裏有燧具新

云云

餽內竺

某生逢百罹未是向安之日夜卧八尺本無求足之心  
謾架衡茅以守梅竹詎圖高誼特有盛頌風鱗分海若  
之珍日笋出山家之藏登嘉愧甚感幸云何

答姜

闕

兄餽築室

辛七兄

某惶恐端拜申稟某官某當乾坤之頌洞本不謀家恐  
風雨之震凌未能忘俗輒營小築遽徹遠聞厚之綠蟻

之朋壺重以青鱖之盈筐登嘉昌稱方命又難

答陳子得策餽築室

某君子之陋室本無妄求有先人之敝廬其如過橈既

葺其舊遂戮而新

闕

答范君範棧餽築室

某桃洞未歸又混浮生之境柴桑投老可無寄傲之窓  
輒因先廬以架後屋眷軫胡篤惠箋劃飛羣翠螭其張  
螯朋黃鱖其駢尾既可以換藿食之腹又可以飫梓工



之饗為餉良珍登嘉甚愧

答趙景文餽築室

乾坤如許本不暇問於一家山林以居亦欲苟完於四壁遂因先世之志謾拾舊材之遺聚為三間滿貯百指詎圖尊念特有餽儀

答梅山弟蒞餽築室

棣萼本是同根分居南北叢辰為之異卜又有後先幸他時雞犬之相聞雖今日燕鴻而何害遂屢先施莫盡

中藏

答永固院周主僧東隱餽築室

某承平之時不事生產大亂之後何以家為謾築三間  
以居百指胡然慈念寵以餽儀

答上乘院主僧如岳餽築室

某悚白見山堂上大教主某切謂己公茆屋雖許賦詩  
元亮柴扉亦圖寄傲遂龜五畝之舊而鳩三間之工慈  
悲胡然記念及此餉有來於多物供反出於十方

餽竺甥禾女彌月

某茲喜友琴底績弄瓦呈祥是為門楣以開宅相

餽高承祖娶

禮嚴承家義重有室鳳飛叶吉早圖卜于和鏘雞鳴相  
成當急聞於警言戒

答親家送生日

某揆於初度方感百罹之逢遺我尺書願蒙多壽之俾  
一謙過甚三復慊然恭惟某人禮行其家仁信於里綽

然有餘裕而浩浩者自存愛之欲其生於親親而甚篤所以蒹葭之倚玉已知松柏之有心某報稱謂何推謝莫盡君子之交如水重投餽以奚安同心其利斷金輒因書而相稔仰丐台察

答趙景文餽生日

讀樂天醉吟之傳偶與同年感屈平初度之經此為何日我方凜凜乎餘息君乃惓惓其眷懷特枉頌言適茲愧汗且水珍之朋集與玉塵而偕來方命則難強顏而

拜

代兄答慶壽娶婦

感田豫鐘鳴之語凜凜偷生誦樂天枕疾之詩奄奄送  
日以逢此百罹之際奚揆予初度之為特為承宗遂嚴  
醮子眷珍何其過厚寵遺如是豐盈却則不情受之局  
眷銘肺肝而曷已非筆舌之可殫

代兄答姜表慶壽娶婦

生不逢辰偶其年之七十迎因醮子於此日而二并輒

憑肺附之親欲舉情話之酌道夫先路謂從者之必來  
遺我尺書乃止之而或尼願豐奩饋以賁庖供初甚難  
於登嘉終恐貽於見訝勉強而受慚感則多

羞屠闕為子娶婦

某茲審令似欽承醮解趣戒迎車取如之何乃吾猶子  
之子欣然相喜况是因親之親區區未羞有客之席云  
云

答張子開教授先遇羞深娶妻

某再拜府博秘郎尊眷契執事某往迎之醮得以及時  
迨吉而歸尚其有日敢圖過軫特枉謙緘文鳩以扇關  
關之古風綠蟻以陶盎盎之和氣有密其餌皆道之腴  
因物而遇教誨之心感德又在言語之外草草奉謝夔  
夔懷慚切祈台察不宣某再拜

答內弟竺少博瀉羞深娶妻

某家貧子壯因與畢姻時異事殊重於廢禮乃醮之迎  
尚遲其歸詎圖眷眷之情言念親親之誼香分浮蟻鮮

割柔毛如此盛儀受之過分

答吳山甫垓羞深淪娶妻

某桑榆晚景謾令孥輩之畢姻松柏歲寒乃念吾家之  
有客修辭賁賁眷意謙謙鮮搜南海之鱗香米中峯之  
實拜而後受感不蓋慚略申謝言仰丐容察

賀董月嶠子誠晬

虔積杏林瑞鍾蘭砌當夏季之三月恰歲寒之一周誠  
印可竒傳家有喜籠鵝壺蟻薄乎其情受之斯幸也



答俞叔可運幹生日

老夫無能為也徒登帝有之年愛之能勿勞乎乃辱過  
謙之譽施箋郇雲而孔縵調郢雪以何高副以列珍光  
於四壁雖泛商南流羽歌之莫致於紅裙醉釀飽鮮幸  
甚不辜於白髮

羞戴帥初架閣

表元

嫁女

吉月登車清風載路竹筥遣嫁之女不輕以與人雪案  
讀書之門必相求以類甚盛舉也

闕

鮑外甥竺明祖彌月

侶鳳鍾和抱熊及月二竹山心之後宗嫡有傳五辛盤  
裏之春家人有慶既成宅相實副老懷

羞戴時芳迎婦

茲審言會雙星又近一日問月老之籍樂得偕老之良  
姻橫雪溪之舟放入半溪之清處云云

羞離孫舒慊迎婦

茲審言戒迎車將諧合卷門戶自立能不為流俗所移室

家既宜庶可遂慈闈之奉為吾甥而喜者豈他人之比  
哉

羞黃甥正孫嫁妹

某茲審家人有慶歸妹已期母命已申豈徒嚴于結悅  
甥迎而願又將喜其盈門式嘉斯配甚盛哉舉其幸譜  
葭好莫旌芹忱輒以末儀載于右幅

羞黃仲叔正雅歸妻

茲審歸自屏金吟聯簫玉言采其藻知宗事之有承彼

黃者桃喜宅相之在抱云云

羞舒景仲崧嫁從妹

茲審歸妹以時家人之慶畢季父所賚之志見難兄相友之心云云

羞趙景文嫁妹

茲審令妹喜行早嫁行即婚期無父曰孤况如女之可念後生為妹幸有兄之足倚因親而親可速而速云云

餽前人六十

某再拜薇山府博秘書尊舅某恭審菊秋垂半弧旦紀  
初潁濱先生為邠君再來瑞世絳縣老人書甲子一始  
周時豈今之人而可以輩恭以某官西山處士東學名  
流兄弟孔懷埴簾之聲如舊妻子好合琴瑟之和自春  
樂以吾天傲視此世曾有數萬卷老於書如做官日傾  
三百盃隱於酒而忘我信其非詭激之過要是素患難  
而行某忝綴內姻阻陪末席天荒地老之際為最知心  
風清月明之間共無盡意羞以薄禮介諸副藤

羞董聲仲雷發娶婦嫁女

叢辰撰吉燭夜融春菜綵庭前看佳兒之諧鳳芙蓉席  
上喜嬌客之乘龍二美既并雙慶交集云云

本堂集卷八十五

欽定四庫全書

本堂集卷八十六

宋 陳著 撰

餽送小引

餽舒通叟內兄太博津八十

某茲審桂秋改朔櫟老生朝內表僅存者三人兄其居  
長上壽方開於九秩鄉所推尊盛德以將斯文之幸云  
云

答趙景文餽生日

某行年八十之身偶然未死遭世百六之會何以為生  
顧蒙矜軫之深特記垂弧之始戒嚴駟傳撞破雀羅鯉  
中有書恍如面其相對鶴南飛曲非其人而莫當卓乎  
古心見之今日與親戚同醉愧無北海之酒樽但翁媪  
自歌浪讀東坡之饗賦是之謂感非他所知

答王之朝

立孫餽生日

揆予初度方慚渭叟之長年遺我尺書乃過魯人之善



頌况委放於奩餽忽撞破於門羅愛之欲生情文備至  
來而不往顏甲又重然方命則有誅於拜嘉而惟謹桑  
榆晚景不虛賦於老饕松柏古心其敢忘於永好莫書  
忱謝尚遲面陳

答竺梅潭自中餽生日

桑榆寸景空驚曰耄之年桃李一家顧辱過情之禮謂  
於詰旦乃其始生登峰絕岸之書辭氣以為壯出月穿  
天之詩句頌而不規况繽紛其餽奩相絢爛於寒屋亦

欲引却恐訝不恭勉而拜之以登如之何其為愧既醉  
以飽當賦東坡之老饕相好無猶敢希北海之偉度草  
草以覆夔夔此忱

答董聲仲餽生日

桑榆寸晷空驚日耄之年桃李一家顧辱過情之禮謂  
於吉旦乃其始生寄風韻於佳詞欲揚春於老况調高  
寡和且無檀口之可歌珍重襲藏惟與蘭心而永好莫  
殫感謝須既鑒融

答舒公凱灼餽生日

桑榆景迫空驚日  
耄之年葭玉盟  
稠顧辱過情之禮謂  
於詰旦乃其始生鯉  
中有之尺書文而皆實  
鶴南飛之一曲頌而不  
規况有玉塵以資湯餅  
兼海螯之虎健而雪羽  
之鳧趨臺餽忽來門羅  
為破亟賦東坡之庖釜  
自厭老饕愧無北海之  
酒樽相延客坐

餽董寬仁妻趙氏生日

某茲審翬飛成厦  
龜吉開堂禪笠歡騰  
挾風雷於鐘鼓

食輪妙轉納湖海於鉢盂聲色不形功德無量某聞之  
亦喜耄矣莫前聊寄尺箋仰塵文席

答雪竇山主僧少野餽生日

某老而不死偶及曰耄之年愛而欲生乃記載弄之日  
素帖粲其下肯已詩與之俱來畫燭辦香非所施於茅  
屋玉塵珍果且相友於松醪辱禮孔勤登嘉良愧孔子  
釋氏抱送之始非我所知惠遠淵明往來之頻於今可  
見匆匆占謝感感餘懷

賻林國器公輔奠弟

某茲審某人最殯既啟柳車將行兄弟至情雖平生之  
永訣祖考同域於幽魂乎何傷某遙睇銘旌盍預執紼  
如筋力之衰耄而江山之阻修欲前莫能此愧矣贖薄  
甚賻禮見諸翼方倘辱指留豈勝幸荷

賀僧雲岫住智門寺

某茲審疇望西堂起臨上刹飛過鵬鷗之化境雲本無  
心豁開龍象之法筵海亦增氣某相知最厚有喜維多

第今年已八十有一塵勞交迫殘息難支既不克前姑  
此寄賀

羞竺少博為子穎娶婦

某茲諗迎相承宗方嚴醮禪聞子有客莫助慶筵某物  
謾包羞而草草甚抵觸而夔夔辱命之留斯過所望

答前人娶婦招飲

吾與吾秩僅如孤月之帶星爾篤爾親忽辱五雲之綯  
日謂欲畢婚於友子亦既得吉於叢辰乃重燕毛而先

鶴髮樂飲未卜其夜雖非敢辭寒疾不可以風其如難  
強尚其雅度鑒此真忱

答前人再招

燕喜相期狎魚書之苛督恙憂未解奈鳩杖之難扶况  
近年之數溲每終夜而十起兼之殘息怯此苦寒縱欲  
強於前途恐有累於北道坡老之酒入務非取外於親  
知文舉之客盈門竊向隅而自分病其仇也幸而亮之

賀林國器任道判

某再拜國器道判外監尊眷契執事某茲諭重迂儒素  
嚴鎮道流舊物青氈來自張巨君之福地丹山赤水依  
然賀狂客之清風得於不求所以可羨

賀前人得子

某再拜國器外監尊眷契執事某稍不交書仰斗可想  
茲者恭諭善交氣母瑞毓嬰兒天師正自有妻本不離  
俗老聃未嘗無子的以傳家奚分儒道之戶門自種神  
仙之苗裔某聞之亦喜耄矣莫前奕碁局之祥想來於



賀語弄麀書之誤尚或免於笑聲

答雪竇寺主僧炳同餽生日

某頓首啟少野乳峰堂頭大禪師侍者某小丹山脚淒  
誰顧於陳門千丈巖頭狎自飛於素帖特謂始生之旦  
不忘鍾愛之心一辦綠沈雙枝絳蠟閭苑蟠桃之實朋  
以圭茶崆峒小麥之塵佐之絲粉盈門其爛舉室所驚  
世情方為之炎涼古道乃過於溫咻老夫耄矣尚有明  
覺主人終身誦之南無無量壽佛還以為報外此難言

仰祈融察

答董聲仲餽生日

揆予初度耄矣堪嗟遺我尺書愛之何寵甲五聯而鐵  
色鱗一尾而箕形維錯甚珍於禮太過草草申謝夔夔  
此忱

答林國器餽生日

揆余初度淒過景於桑榆遺我尺書燦謙光於蓬蓽俾  
爾以壽愛之欲生加叢餽之賴肩走長鬚而流汗老夫

耄矣忽饗鼎俎之肥甘中心藏之愧乏瓊瑤之報稱亟  
庸申謝仰丐丙融

餽董聲仲孫尚志試週

某茲審庭喜含飴席間試印蘭孫瑞脈三世之福慶皆  
全桂子香時一家之功名有兆其為歡愜不甚揄揚

餽竺梅潭自中七十

某再拜茲審年及布有旦書始生竺國之脈分來是為  
壽佛梅潭之心參到可謂善人八秩既開一家同慶某

區區無以見意云云

魏王之朝生日

誕日書瑞壽星炳纏山果數圓侑以南海潮之錯溪藤  
一闕寄諸西江月之聲仰瀆慶筵以供笑具幸大長者  
必不多訝於寒羞有小蠻子或可一歌於老曲偶掣其  
肘阻賀以躬

羞剡竺申之為子娶婦

茲審庭秀諧婚家嚴醮迎侈開有客之慶懽洽承宗之

心云云

餽菊坡族父生日

某茲者恭諗蓬戶紀祥菊坡集慶惟翁耐晚笑看世變  
之浮沉有子成名坐待時來之榮養某區區無以為壽  
率易某物云云

謝菊坡族父餽生日

某皇覽初度方嗟不辰阿大中郎乃記此日云云

答郡庠請正月二日鄉拜主禮

三百六旬元又新於鳳歷八十五豆禮莫重於燕毛猥  
枉來章俾趨拜席老夫耄矣雖無鄉曲之典刑吾道非  
耶亦見校庠之風教餘容面叙仰丐心融

答王之朝餽生日

某八十二歲蕭然欠死之軀三百六旬長是卧疴之日  
於死生乎誰記乃高誼之我矜藤染真題花駢過頌青  
甲挾鬻金之富紫海温猩血之鮮賁然叢珍寵其樗朽  
受之非受之是姑一付之空言俾爾壽俾爾昌還載歌

而為報其如愧激不盡敷宣仰丐台察

餽黃子羽山長翔鳳八十

某恭諗瑞紀嵩高美開淇澳彭仙同歲方是十分之一  
分少皞行秋後於七夕之二夕相慶以酒言壽斯文某  
幸托姻聯阻隨賀列以擊壤之聲為曲而居山之物非  
儀草草左陳夔夔中懼文之不足雖無鐵杖生鱗之詩  
實則有餘是亦金籠放鵠之意倘蒙采領豈勝感榮

餽竺少博七十

茲審人日紀瑞福星應躔二竹老仙七日實開於八  
秩大椿壽相十分方慶於一分內表之親中心則喜某  
所盍稱賀如其耄

答林國器餽生日

八十三歲已薄我於下春四六一箋乃光吾之初度弗  
曰有來而不往但云既耄之可矜翠甲張螯挾墨繡而  
為藉玉塵絢彩偕酥餌而受封撞入雀羅塞破蛙舍簞  
瓢心事幸四明狂客之素知奩篚情文實孤竹餓夫之



過望勉強拜辱感愧填膺亟此申酬庶其丙覽

答竺梅潭餽生日

三峰冷派荀愉愉景之陰二竹清風忽送朶雲之翰念  
其初度侈之盛儀雪鵝在籠綠蟻浮甕且富玉塵之膩  
以充湯餅之資親親誼隆物物珍重今朝盤飮何妨厭  
飮於食神明日瓶壺難禁揶揄之窮鬼受之茲愧謝不  
盡言

答王之朝餽生日

方朔飢欲死於初度子誰矜平仲善與交乃尺書之我  
遺雀羅忽破蝸舍皆驚翠鱗郭索而張螯品空珍錯綠  
蟻噉喙而吹面香勝碧筒豈疎怠者宜蒙直温存之太  
過况於狎餽曾不逾旬至於再而至於三又富今朝之盤  
釘知其一未知其二其如明日之甕壘中心藏之前言  
戲耳

答董聲仲餽生日

三峰冷派苟安四壁之居雙杏清風忽送五雲之翰念

其初度寵以盛儀行行張螯形如蟹而非蟹僕僕冠胄  
名似魚而非魚兩皆錯珍羣然類集今朝盤飮何妨厭  
飮於食神明日瓶齋姑聽揶揄之窮鬼受而知感終不  
蓋慚且此申酬尚其丙察

答淨慈寺主僧法椿餽生日

某啟靈叟景照主人某辱既西來有光初度一斗麩未  
能易方此自憐百索洵非易成忽焉遭餉兼之日筭重  
以雲篇所揄揚者過情於衰朽而流汗感無如愧牘有

餘思斯語云云奈拘以僧伽之帽他年笑笑却入諸惠  
遠之盟

羞舒公凱歸妻

茲審龜從兆墨鳳舞歸駮月嶠舊游夢視屏金之隱繡  
斗門峻閣歡迎蕭玉之吟香燕爾新婚時乎為養某忝  
聯葭好茂效芹忱奩霜粉以十封籠雪翎而四翼簡毋  
乃簡非所供有客之需然豈其然聊以見居山之禮倘  
不之棄是亮以情

答竺少博餽內子生日

某荆釵偕老實徵福於外家藻帖蜚香乃篤情於內表  
謂眉裏之年六十而毫端之頌再三餽以柔毛加之麩  
粉雀羅撞破魚釜開烹鼎俎驟陳轉啼飢而為笑琵琶  
相顧愧拜辱之難酬意則有餘言之不盡

答董聲仲餽內子生日

某荆釵偕老六十歲之俄周葭譜篤親咫尺書之下賁  
侈然頌語重以歌詞且羅拜於錯珍是厚加於顏甲貫

珠死轉愧無櫻口之奉揚烹鼎方鮮徒有覓腸之拍塞  
其為感謝莫既敷宣

羞王得淦為二子娶婦

茲審醮解孔嚴迎車並戒大男既冠遂諧鳴鳳之歡介  
婦未笄姑效隊魚之聚汝宜樂只我亦與焉區區無以  
將意某物愧甚菲涼亮之幸也

餽王之朝生日

茲諭揆初書舊曰耄開新眉裏歡酬如琴瑟之好合膝

間拜舞與珠璧以聯輝及此默暄樂哉家慶某輒有鄧  
州雙燭蓬島辦鄉交廣糴根效一牽之水墨崆峒小麥  
供十斗之霜華自文寒率以為珍聊為熱慚而着甲式  
相好矣庶幾無門外之標寔能容之亦可助樽前之笑

代回交印折筵

甫領銀菟遽披玉壘豐以初筵之禮貴然北道之情對  
使拜嘉銘心知感云云

回帥司送入界合食

畫蒙函墨厚遺盤珍已嘗杞圃之分嘗

東坡事

忽夢菜園

之踏破拜嘉敢後飽德難名其諸謝懷尚容侍叙云云

回曹司合食

肅奉寶緘特頒珍餽紛鼎烹之滋味增旅瑣之光華僕  
僕拜嘉拍拍飽德其諸悃謝悉容面言

告至劄

無裨樞掾過領藩垣六月於征豈人情之難已一日即  
發如上旨之甚嚴遵陸此來無程而進將涉君地忽鼓



舞之由中瞻仰福心已照臨而在上盍簪孔邇削積以聞

送交代筵

忝辱寅恭過蒙篤舊可無草具少贄蘭盟第以在途末  
由肆席薄陳鼎俎之禮少申葑菲之忱

謝交代郊迎

符竹闔乘甫詣崇臺之下轡華臨隰顧居末座之先自知  
宜亟於庭叅誠以尚遲於殿謁晉步少詣謙光已垂亦  
末如何徒抱中心之愧非敢後也尚徵平日之知

謝暖熱會

傍長沙城小駐柳邊之馬捧雲朶翰寵移竹裏之厨為  
禮太隆循心非稱第蘭交之義重又瓜代之盟新不敢  
避辭恐貽譴訝樽酒細論之約每謂何時簷汀清酌之  
歡乃逢今日拍塞忱謝悉容面陳

代回湯倉

名漢

誤恩郡寄端自虛放便道治封正圖象晤挹光華而已  
近忘襪襪以欲趨忽蒙雲朶之先飛乃諗天花之偶散

意諭甚至膝前則非徒望堦墀願言金石區區謝悃尚  
容陸續控申茲得以略

代回吳宰

誤恩分閫顧短袖以低回高誼通家寵長箋而遠遺一  
謙過甚三復慊然仰惟某官心挹圖明眼空煩劇刃往  
牛解製錦特見其緒餘鞞脫鷹飛入幕皆為之辟易轉  
而上徹行矣中除某猥以菲材偶茲承乏冰翁既往幸  
遺躅之可追玉我以成尚知心之是望占酬草草莫盡

惓惓

代陸雲西回姚制使謝筵劄

頓車而舍竊庇星垣崇酒於觴微榮雲燾恃包荒之有  
素忘惡草之非儀銜袖方投諾金隨拜已不勝其過望  
乃更賜於謙絨欣幸雖深凌競采劇坐之花具愧無許  
學士之風流酌以松醪聊奉蘇學士之雅意

代前人回許僉事

名雷發


誤恩易節方此循牆高詣鳴謙翩其蜚帖揄揚過矣感

愧若何有如某官其材通周其氣明銳生四忠之國自有見聞受百篇之詩非資議論既縱靶於平陸胡轉帆於急流誰知此機乃進之道某官情素淡歸興甚濃訪蘿桂於風月之中我所欲也收蒹葭于霜露之後子其勉之云云

答林國器餽生日

某八十三歲蕭然欠死之軀三百六旬長是卧疴之日於死生乎誰記乃高誼之我矜玉粒垂雲銀絲絢雪

鱖甲張螯而郭索雞頭飽肉而圓香膏然叢珍寵其樗  
朽誦東坡養老之饗賦味哉拜嘉歌南極現身之來辭  
還以為壽其為感愧不盡敷宣



欽定四庫全書

本堂集卷八十七

宋陳著撰

原闕





欽定四庫全書

集部

本堂集卷

八十八至  
九十

詳校官庶吉士<sub>臣</sub>李傳熊

主事<sub>臣</sub>呂雲棟覆勘

總校官進士<sub>臣</sub>朱鈐

校對官主事<sub>臣</sub>陳墉

謄錄監生<sub>臣</sub>周銓

欽定四庫全書

本堂集卷八十八

宋 陳著 撰

祭文

祭姊夫童慶純文

維年月日眷弟陳某謹以清酌庶羞之奠致祭於故處  
士童慶純姊夫之靈曰吁嗟乎君而死葬日且薄矣  
母端平三禩而我先君遊二千里我惟斯艱哭不能起

闕

君心念我謂家可棄爰挈其孥提囊負笥其來僕  
僕甚勞弗弛六年之久弗隨初志昔我有廬受囿于水  
母時未病材料圖徙中道而病病死誰理君傷而籌鳩  
集其事維綱維紀維我之姊維奔維走維君子女棟宇  
斯成風雨攸庇我時孤居獨學無侶君方携子于泮  
之涘我思游從君曰來止燈火飲食勞以休爾愛之至  
也教之則備何子何我以一等視昔我先君為我擇配  
必儒之門匪儒則置君親執柯媒以契是鳳凰歸占君

之猶子之子于歸執我壘筐匪德于私先君之慰吁嗟  
乎世之人知愛其子孰知其他知營其居孰知其餘子  
當愛育及人者誰子當婚娶孰人之顧有義于一孰備  
于四君之于我四義則備我昔父母以子妻君謂君為  
義我幼已聞始惟聞之乃終身之舉此四義凡百可知  
我意君壽與君周旋年僅六十云胡不天君之二男是  
書是賴君之二女亦既長大男何可期女當有歸我姊  
既老我分相宜不曰不才厥惟志哉言有窮也有無窮

哀乃復哀之以詞曰桂酒兮芳馨殽核旅兮進退遠  
君之去兮何之歆我奠兮尚來歸歸來歸來兮恍猶見  
而終非懷義我之深兮耿欲報之無期涕疾下而淋衣  
兮佇吞聲而迴思人之生而固有死兮嗟無憾其幾希  
獨青春而不羈兮九萬里而風飛駕重湖而沂西江兮  
鷗鷺狎而忘機清淮洶其拍枕兮眇浙水之東西冉冉  
其告奠兮驚志淒淒回問田園而失笑兮眷丘隴而歎歎  
子參差以讀書賈此志而何為慨雪堂之風流兮規一

室而與之名紛萬象之過箭兮倒壺觴而獨清生死寄  
之醒醉兮孰死而孰生迨其死之不復兮乃知其醉不  
復醒翕忽而飄蕩兮固不自知夫前日之有形奈闕彼  
南山與亭亭

祭吳隱耕文

世降俗衰如君者希君有四善我能言之今人有室私  
財必殖君之幹蠱繩墨如尺今人弟兄易以私爭君之  
愛弟終始真情今人處俗繆敬為睦君于族人以直為

獨今人友朋聚散雲萍君之相與一義死生君之四善  
知之者鮮惟我獨知以久交見昔我束書寓君燕餘坐  
閱七年情親意孚我有大事君為經理我織我悉君與  
憂止花亭月廊風簷當窓醉歌劇談握手連牀有如此  
者何可忘也謂君長年年亦我假往來追尋白首家林  
此志未諧君疾已侵病日深矣終以不起彼蒼者天胡  
奪之急昔君死時我亦不知今君之葬亦知其期昔留  
于縣莫哭其斂今又留城莫臨其窆我豈欲然動以事

牽此身則留此心則前永訣之語寫而西去歲暮來歸  
歸哭其墓尚享

祭童氏姊丈

維景定四年歲次癸亥十月戊申朔越二十有三日庚  
午弟迪功郎持差監提領江淮鹽茶所蕪湖茶局兼準  
備差遣陳某敢昭告于亡姊陳氏再十九夫人之靈嗚  
呼吾忍哭吾姊之訃耶十歲而哭兄有十五而哭次姊  
獨吾姊見吾五十歲命又哭之矣吾喪父母吾兩娶妻



吾為貧奔走出入扶持之經紀之勞苦撫摩之有吾姊也及吾僥倖一官馳逐寸祿豈不欲奉吾姊而行而廬陵而闕而當塗皆去鄉阻遠而吾姊且日以衰不可

遠出猶謂自今謀闕浙東舟楫所便雖甚衰亦可迎侍天乎吾志未遂吾姊已病矣夏五鄭明回謂甚革吾甚憂孟秋得便中書則謂病少間吾又喜至九月十五陳用回乃以訃告嗚呼吾忍哭吾姊之訃乎兄弟姊妹四人今獨吾未死吾年已至此且衰而病吾在世尚有幾

年死而有知相見固自不遠未死之前未見之心尚能以言宣哉况其在千里之外哉謹告

祭前湖南安撫趙德脩檢討文

名必普號用  
拙寧國人

嗚呼吾公而止斯耶天乎莫贖我心之悲聞公之訃維春之莫維夏之初聞病之故候問以書書答渠渠鋪說平生靡有遺餘反覆言語若永訣者我心皇皇再訊牀下東閣之言謂公再生昔病者腫今忽其平我聞之惻是病實革曾不素期而簣已易去年春時自浙同歸櫓

港之別淒極雲飛我官蕪曲公住林谷二百里隔書饋  
往復山居酒詩我志未遂官事攸縻公之標致有神仙  
氣公之仕宦清明如水精神之全宜壽以安我從之遊  
亦未易闡豈料今日公歿在室雞絮之奠借便臺檄檄  
期匆匆欲流無從一慟誰知葉落山空

祭舒氏女甥文

去年六月聞汝訃音即欲遣奠以寫我心握筆者幾心  
痛難寫今聞汝葬寫以告汝汝昔喪母未三尺長已如

成人泣血終喪呱呱相對有弟有妹汝撫摩之以至長大汝痛母亡見我則傷我見汝面痛亦滿腸及汝出適泉溪之側我便往來時節款密辛酉春初別汝而行而京而湘安信便番我來江左不聞汝耗遣書問安乃以訃告聞汝垂絕了了無他叮嚀遣訃母遺外家此時此語此痛極處我聞之痛痛及汝母葬且有期我未能歸歸哭其墓未知何時

祭趙氏外姑董安人文

歲在辛酉維春之首拜遠于庭急祿以走歲月如流歸  
省無由中諭馭鸞以覓仙遊惠山茶水姑蘇菜水三年  
盤薄琴瑟清美某時往還昇潤之間相去孔邇亦願承  
顏而不遂願微官斯絆猶謂明年歸舟其便誰知因循  
生死之分中秋聞病隨而訃聞恭惟淑德賓敬翼翼有  
男既官女各迨吉既壽而安燕樂團圞胡為夢斷五十  
七年歲且暮矣聞訃於次緘辭一奠尚歆其意尚享

祭京太府卿孫元實文

光岳氣分人物孔難或數十年千萬人間偶焉生賢可  
以用大而用不盡有不在我某昔叅隨嘗講聞之曰誠  
曰才曰學力時維此五者無一不備惟古之人得以行  
志傷今思古相對永歎先生已矣有感斯言言必有信  
動必有準待人必敬遇事必謹實而不華忠而不欺先  
生之誠于馬可知精神閃鑠青萍出匣所向者行先生  
之才當世獨稱寶齊之印面以相授益自切磨久軒其  
後體用一貫本末兼該先生之學有自來哉三者備矣

人望攸萃而病在心耿耿不寐事業何涯中壽莫延先生之力人耶有天而况平生仕至鄉尹隨起隨仆諧者貝錦棟梁之材厄而不通先生之時未為遭逢某之登門獨在人早某之受知人知者少先生之喪僅哭其散先生之葬某適在官江空歲老形留心往緘詞一奠以補實狀尚享

祭馬觀文裕齋文

三代之上人物混融天地之間一片春風三代既遠間

生人傑如大昏黑時見秋月乾溥以還人物愈難體用  
一元獨也西山西山之學可以三代而不大用梁木其  
壞幸而有傳先生在焉四海具瞻如渴赴泉才大難用  
名高見忌豈不登進進隨以退退而弛勞過者滔滔我  
心不暇憂心忉忉况今天下終不我舍繁劇之都風寒  
之野一號一令山岳動搖精神所到覆盆莫逃其于小  
民父母携抱來迎去留感泣遮道甲子之夏復于江淮  
豈其建牙於以起家

自注云理廟御繫以金陵起家入相有日先帝之意先



生之志霖雨蒼生行有日矣尚忍言哉弓劍忽遺夜半

之慟此心誰知

自注云夜半遺詔到公大慟自牀投地

戊辰之入民猶有

望亦既近止風引帆往歸卧林泉病忽其纏竟以不起  
人也有天某忝末至受知則異匍匐往弔亦曰有義官  
守縻之莫遂我私為位以哭莫紓我悲悠悠歲月寥寥  
宇宙緘詞以將炙雞絮酒尚享

祭孫朝奉文

維公之生元氣之英是生賢子義方以成子曰以貴鼎

鼎功名公日以樂風月與盟長篇短章牙頰播騰迎養  
所至搜竒摘清家林之趣竹屋梅亭我從公遊閱幾霜  
星折節下交視如友朋中間違濶微官所縈已未之冬  
歸自廬陵夜半雪深拜公古青一見喜極菜酒寒燈三  
日而別千里月明十年之間書不盡情公今壽終我終  
營營聞公之葬欲送莫能薄遣雞絮尚歆其成

祭浙東安撫大府卿饒瑤山文

名應龍

天地之間偶合為難一語之投平生之懽如父子矧

及一年抑豈尋常遇合者難然先生之學玉海金淵先生之文正色芒寒先生在朝秋霜其嚴先生在外春暘其暄衆流沄沄皆宗大川拳石紛紛皆附泰山某之登門不居人先胡獨受知粃糠在前坎坎世變凜凜縣灘拙不敵巧方不投圓是張是維是存是全顧惜主衣歲寒之妍事不可測公忽病纏誰能無病病亦既痊拊賀方交而以訃傳民失父母國失忠賢我失我師彼蒼者天尚享

祭知饒州唐忠介公文

名震字子華一字景實越之嵎縣人

維宋德祐元年歲次乙亥七月庚午朔越二十有二日  
辛卯契生某致祭于故判府節制待制忠介唐公之靈  
曰嗚呼公得其死矣嗚呼公得其死矣人莫難于死死  
于封疆則忠在社稷義塞天地可以作一時之忠烈勸  
萬世之臣子公之平生此學此志方番易之弄印詔起  
公于田里不以我為不肖謀出處之大致我贊公以必  
行公以時而強起時內子之卧病亦奚暇于療視輿病

登舟以至於蘭溪之涘便信西來苦語竟紙曾此書之  
幾日而以其計至禍患忽其相仍洵四郊之多壘氛漲  
而越江凜孤城之如墜彼哉奸權借以殺士痛呼天而  
香邈并要區而俱棄忍一旅之弗援斬一節而弗異愛  
莫助之我有痛哭而已猶遺書而靡倦以堅守而自誓  
從容就義一語真可對越無愧彼望風竄降者豈其人  
類况難兄之相從竟同盡而無貳是又可以去可以不  
去而義死于此世方瀾倒而波頽乃有如此之同氣公

今從真果地下遊吾儕之苟延旦暮者未知所底胡怪  
誕恣睢尚欲肆其詆毀是不知世間之羞恥幸二孤之  
有托庶無憾之後世倘我死之或遲尚維持其一二興  
言至斯有不盡意翩然雙旆慘其跋履行道之人歎歔  
流涕矧我異姓兄弟之情當何如其痛淚遮道哭公幾  
若相避緘詞渡江茫茫雲水

祭亡男朝兒墓文

維丙子七月二十六日父告于亡男朝兒墓下汝生于

行都之簽判廳長于通判之北廳天下大亂母挹歸避于三石之祖居于里西之黃沙坑于西坑南粵至五月二十日轉而北寓于董村之內表竺家七月初二日得痢疾百藥不效二十日忽噤如風狀吾適出邑乃能忍死以待吾歸歸而呼之口雖不語而流盼睨視將投身于吾懷中既而忽焉以甦隨呼隨應服藥食粥不少減吾謂女可以再生二十日寅卯間而六脉竟絕矣猶戀戀于母之懷父之手有問則聲答漸微神則不亂午刻

噤以沒嗚呼痛哉汝生五歲早悟多識教以書能強記  
耳傍誦者誦之亦如流兩年来患難迫逼風雨山林摧  
折撼頓卒天其生抑命也夫汝之病既不肯輕離其父  
母汝之死又安得不視汝如生存哉死而有知其聽吾  
言骨肉歸復于汝二先兄之側魂氣則無不之其惟父  
母之隨嗚呼痛哉

祭外舅趙元章知縣文

崇素

公以儒學早歲入官而不世競勇退早閒我以末第公



方擇壻卓乎心斷以其女妻時事孔艱我歸故山公適感疾一夢不還我方逃避于林于谷計來間道戴星往哭瀕洞日甚再前莫諧為位以哭服我總麻我服既除日欲剪墓出門日幾風埃塞路姑先一价將我悲言尚其有知鑒我清尊尚享

祭從兄同父文

嗚呼兄生于世七十年無一毫見異于衆可謂鄉之善人歟予相從自幼至老無一語之間可謂友愛之兄兄

死已四年鄉失善人過者流涕況予之喪尤悲又可知矣今葬且有日音容以遠惻惻焉以多病之身居多事之世其能久存存亦何樂然猶得力僉行哭以送凡于西山之西先之一卮以寫予悲尚享

代趙菊泉祭外姑文

娶妻非難難于相宜許妻非難難于相知惟先外舅知我孔厚妻以長女而不及壽命雖靡常亦我累之意氏人者或憾于斯誰知外慈親親是篤復妻以子斷絃斯

續荆布相安山林之間承宗為大得嫡為先嫡有傳矣  
祖考之慰凜凜不孝或免于此追念厥初自外舅姑感  
當何如報當何如庭萱獨耐謂可百歲偕女歸寧執禮  
弗替胡天不然一病遽纏子喪在殯穉孫在前垂沒之  
際顧女若婿若曰家事有若輩在今已矣夫其知之乎  
婿猶子也孫不為孤相扶以成有如皦日歆此淚觴安  
歸幽室尚享

代趙松壑祭陸雲西文

嗚呼哀哉公而死耶百身莫贖君子之嗟亦知君子知  
公多矣我不必言而不能已公之精神清不受塵及其  
即之時雨陽春公之心事其直如矢樂于成人勇于為  
義公之蒞官電熅雷轟風休雲間倏忽之間公之文字  
散滿中外意動筆飛有神仙氣人才如公乃人中龍我  
知之深蘭契稠重維桑與梓維葭之荷維今將輸寔踵  
芳軌回首前冬供軍堂中留連夜飲笑語從容去冬之  
晚訪公道院公時已病別語悽斷公病日難訊問往還

公以召歸舟遇龍灣追路攀見謂可一面風急帆開江  
空人遠寫心以書猶及南徐公不能答我心何如為日  
未幾訃音在耳豈不欲奔一慟而死官守之縻不得以  
私緘詞千里莫紓我悲尚享

祭同志道文

斗春

維歲次丙戌三月十有一日甥具官陳某謹奠告于志  
道鄉貢學正童君之靈嗚呼公之為人如老寒梅清癯  
立骨挹其氣則芳君之為文如木假山峭刻少肉而玩

其氣則長其處家也生理多不足而有一非義之利亦未嘗妄取其交友也已見多自信而有一當理之言亦未嘗不與以此而得亦以此而失所以一薦于鄉而終無所成名一窮至死而無以壽斯文之緒也我與君姻譜有連又與君燈窓有緣相得相知如兄弟然妻我以妹君寔主是妹雖云亡君不我棄時則往還白首相看君七十五我七十三謂猶可以相與苟頃刻于日暮天胡不知我心願使先我而去我哭訃而欲馳溪漲遲其

來期恨不得見君於未斂徒撫棺而心摧屋瀟瀟其環  
堵草萋萋其深雨一坏之土誰展一盂之飯誰主魂與  
風而俱飛魄與水而俱歸伯喈有女而無益伯道無兒  
則可悲人世如此亦云極矣尚忍言哉有慟而已尚享

本堂集卷八十八

欽定四庫全書

本堂集卷八十九

宋 陳著 撰

代趙菊泉祭妻兄文

嗚呼君其復能醉我于雙溪之風月天乎君其復能訪  
我于西山之猿鶴間乎雲悠悠其去來花冥冥其開落  
君之魂已與夢而飛揚君之魄已與影而寂寞呱呱在  
庭惻惻無託時事紛乎如麻世德凜乎如髮此我于君



少年之不幸不能不失聲而哭于君亂世而早蛻又自  
嘆我之不君若也日月不居遠卜既薄敢堂既啟若語  
永訣門戶安存于百罹家兒長成于力學固主張之有  
人而亦我輩之責此外又何言哉其歆我之一卮

祭趙景文文

必昌

維歲次癸巳十有二月壬午朔越三十日辛巳錫具官  
陳某謹致奠于前鄂州教授從事趙君之靈嗚呼哀哉  
雞酒之奠今日何日孰料其為君設耶君年方中壽平

生未嘗病而竟不起君舍優解褐入仕而仕不及一日  
之祿君避世廬墓西山而苟焉無卒歲堂有垂九十之  
母室有未四十之妻男之長者猶未能應門而幼者三  
皆未能學所以學女之長者僅使之有家而幼者四皆  
未知所以歸目前已可憂來者又可既君而可忍于死  
耶然命也在天君亦無如之何也已人之有生莫不有  
死得其死則雖死如生于君感疾而問焉坐而談笑  
者終日尊酒相與如平時猶以詩文相諗其可否及君

之疾病而問焉顏色雖若變異氣息雖若促急猶未自  
悲其將死越三日而訃音告聞之于却藥之時屬纊之  
際道生前所遺者甚悉付身後所嗣者甚長片言不亂  
一汗而歿尹師魯之畧無戚色張橫渠所謂吾寧其得  
之矣夫復何憾而余則有憾焉予之娶乃其妹而禮之  
之過有如兄余之業劣于兄而聽之之敬有如斯世道  
不古鏗薄成風而謙以下人虛以進學雖老而未涯也  
而死矣而葬有日矣此予之有憾非無從而哭之不知

其有慟也子年已八十一息不續則魂無不之無不之也上下四方當有相從時也尚歆予此奠哉

祭內兄舒通叟

津

太博文

維歲次癸巳十有二月壬午朔越五日丙戌內弟具官陳某謹以雞酒之奠致奠于內兄前太學博士舒公之靈嗚呼兄于為已也一敬自持于與人也一真不欺于宗族也有義焉而不可干以私于鄉曲也有情焉而不可挽以隨是以行足以表文足以師于家塾則戶屢常

滿于太學則解褐優為達而仕宦任內外兄更六七凜  
然有氷槩之操窮而山林享康寧閱二十載挺然有松  
栢之姿人生有一于此亦非易得兄而衆人兼備視世  
人為幾希人生七十已為希有兄而壽八十有一于天  
命而無虧居常款接歎美及之兄則愀然為之攢眉謂  
吾晚而入仕祿不及養而血泣于罔極之思謂吾同氣  
者四乃獨後死而垂老受諸孤之遺吾年既髦所賴一  
兒兒亦克家不墜詩書奄然天喪痛何以支吾有長女

積病成癡所恃者母以食以衣母又衰病顧恤者誰弱而未冠之姪未必能應門戶幼而未教之孫未必能紹裘箕荒江之濱孤處之屋既無以遷而何以安其危多菜之鄉數畝之田既粥其半而何以贍其飢汝以為吾之心其樂其悲余泯默而不答付哽咽于一歎余于夏五問兄于一病之後見其食談微過嘗告以謹節而養其脾兄則曰吾猶健嗜其甘肥至季秋而再感察其色色之異則憂其藥石而醫治而兄方命其左右掖而出

南窻之下置酒煮餅詳及其遺規斂必純于布而寸帛不施葬必于商家之山而他非所規事辦既葬不必泥流俗之妄推是又見其治命了了不亂意猶有少間之期而竟不獲起訃音隨馳聞之病革了無他辭惟戒家人以約余一面切切焉惟恐其遲遲越三日而莫余告竟費志而為九泉之歸豈其欲言不過疇昔之所聞抑有未盡之言而非予所知然生前身後人也有天亦曰委之天而奚疑嗚呼予之無良不及俟其屬纊雖自咎

而何追而今而後溪山之雖阻歲月之如飛精神之已耗筋力之已非苟尚可以還可以往可以網可以維勉強自力其或庶幾姑曰死而後已而苟延其能幾時其聽予言舉此一卮尚享

祭集賢學士趙岩起文

孟傅

大淵獻之歲七月孟秋庚寅具官陳某謹以雞酒之奠致祭于故集賢學士趙公之靈昔我贅幕秦淮之涓既而客潤雲西之隨公將適漕寔踵雲西六轡未驅尺書



先馳若師所尊若曰可師懇懇其誠謙謙其辭謂雖已  
去必欲來思不曰不敏登門猶遲胡聽之過而至于斯  
嗚呼誰能如公取之于素昧之中而甚平生之相知我  
昔于潤滯留斯久舊幕在望未諧奔走乃獨我容曾不  
我咎春風飛剡顧叨薦首旁觀者饗豪揆而取茹憤狎  
諾以秋為候彼有力者又掣其肘舉于他門出于公手  
公終不平我知所受歲貢有限人物為藪為我之故空  
其所有嗚呼誰能如公薦之于無求之表而甚于欲償

之宿負昔我家居公專閫相與排難謂我其前從遊之  
舊如同氣然縱無一德亦宜周旋止或尼之終孤懸懸  
時忽其異事歸之天天涯再駕生死之間我又罔聞莫  
如攀轅人于此際能無尤焉而亮于心付之忘言嗚呼  
誰能如公安平相為樂而患難不及共乃曠然而不我  
愆公之于我有如此之特達則我之于公不無愧怍數  
年之別而萬里之遠隔一病而絕而九泉之莫作公之  
心自知泯默于冥漠公之魂誰依將飛揚乎空濶惟旅

櫬之或歸庶慰吾州里之懷德而初心之獲遂今乃與  
父子而同穴外于此者何言寄萬感于寥廓古意一奠  
老淚雙落尚享

祭石君瑞料院文

德祥

維歲次乙未閏四月乙巳朔越四日戊申契生前進士  
四明陳某謹遣男深致雞絮之奠于料院朝請謹齋石  
公之靈嗚呼余交天下士有如公之于我三十年之別  
初心無二者乎余蟄處山林有如公之於我數百里之

外長書狎賁者乎去年之春讀公之所誌尺書之復及  
我之所同意第顧我之病衰當先公而奄棄忽首夏之  
既望兒曹以其訃至哭不知其有慟事難料者如此奈  
筋力之不任躬欲弔而莫遂禮以見情敬戒雞絮死而  
有知尚其歆只三洞之山雙溪之水耿耿悠悠嗟余髦  
矣

祭邑教蘇德淵文

森

維歲次乙未九月壬申朔越七日戊寅四明陳某謹致

奠于縣教蘇君德淵之靈嗚呼德淵而仕止于此嗚呼  
德淵而一病不起嗚呼德淵而獨死于千里外之漫仕  
是三者皆歸之有命而已君平生學易固自超悟乎此  
理又何憾乎生之與死然吾則不能不悲惻者有二今  
年之夏勤勤訪問青燈劇話肝胆相示豈不欲留而迫  
于西行之計謂我重来庶予心之可既安料其還一面  
未能而君死矣及孟秋之末君病于旅垂革之際力書  
走遣其智慮之精深與尋常之無異吾盍驅前謀及療

治奈亦臥疴莫輸此義猶望君之少間吾亦可以扶曳  
尚相與須臾乃忽焉而訃至徒迸淚于枕席之間莫哭  
之于寢門之外友道謂何終天其愧吾幸今瘞來薦雞  
絮魂兮有知其歆吾意若夫奉其全而終歸則于遺言  
而誰戾何氣非空何迹非寄有時乎從吾亦豈久于人  
世者哉尚享

代邑士祭前人文

維歲次乙未九月壬申朔越十五日丙戌某某與六館

諸生等謹致祭于教諭竹軒蘇公先生之靈嗚呼先生尚能張拱濶步為學舍任教事之責乎尚能明目張膽為縫掖回元氣之脉乎嗚呼吾知其不復能矣誰知諸生之心有不能釋者乎昔也非不欲衿佩青青以安吾庠序也而厄于農戶與編而莫之拔昔也非不欲絃誦洋洋以暢吾詩禮也而苦于公徭例及而莫之樂今也貴其所自貴而官之莪帶之博今也得其所自得而籟之鳴機之躍瓦礫矣而復為圭璧蕭艾矣而復為蘭葯

不辱孔孟之門不墜鄒魯之籍轉軸乎六陰之凝沒垂  
綆于千丈之直落彼憧憧者自滔滔此烈烈者自卓卓  
方將日以象之如文翁之在蜀家以奉之如康節之居  
洛胡然伏枕至于易簣若夫視飲食而親湯藥備衣衾  
而治棺槨則吾徒之計慮甚周與家人之恩勤相若無  
一毫之可憾以歸全于冥漠嗚呼學而優則仕仕而優  
則學于仕學乎何忤生于我乎館死于我乎殯于生死  
乎有托雖游魂之為變如風如雲而遺德之無窮如山



如岳輕百身而莫贖重九京而莫作體治命之孔白敢  
終事之不恪旅敢既啟樞引隨發寄心喪于會哭奠卮  
酒而永訣尚享

祭禮部尚書王伯厚文 應麟

柔兆涒灘之歲孟冬甲辰契生前進士陳某謹以爇雞  
絮酒之奠祭于故內翰尚書厚齋王公之靈公之聞望  
北斗泰山公之學問洪河長江青春大科撼動一世紫  
霄濶步凌歷兩制凡大詔令雷風其行凡大典冊日星

其光代主之言為國之重進而文昌行矣柄用亦既簡  
在宵衣之心時不我與天乎難謀與雲俱飛三島之上  
言采其薇布衣蕙帳執經于席問字于庭淑我鄉里幾  
兩周星誰知其中難言如海能無知者猶有予在前歲  
之除去春之初相看話舊耿耿如何雖不盡言有不盡  
意余八十三公七十四自謂予死當居公先公而先之  
訃音忽傳季夏聞訃老病憚暑哭于寢外而莫即路今  
茲默暄始獲造門予亦朝露其能久存天高地遠江空

歲晚公兮有知歆余一奠尚享

哀辭

戊寅正月二十六日更四夢中見朝兒大慟淚如雨因作招魂詞三章

朝兒朝兒汝之家嵩溪之湄梅竹參差風清日遲窗戶  
逶迤有書有詩汝昔娛嬉今汝何之汝而有知父在斯  
母在斯兄及弟在斯來歸來歸

朝兒朝兒汝之死雲南之羈水湍石坻山頽樹欺行者

足眠望者神危汝昔我隨今汝誰依汝而有知父在斯  
母在斯兄及弟在斯來歸來歸

朝兒朝兒汝之葬丹山之支林寒鳥希雲深虎嘯蕭蕭  
風悲冥冥雨垂汝安邪非我其汝思汝而有知父在斯  
母在斯兄及弟在斯來歸來歸

屠退翁哀辭

名進之字漢卿號退翁  
居連山溪口癸巳歲

余與退翁契非他人比其子應觀來哭而以二  
親未葬告余余助之薄于其行贈數語庶乎有

見而哀者

哀哀退翁兮予之畏朋死而莫葬兮閱二周星予見其  
遺孤兮哭之失聲翁富于積學兮案雪囊螢緯而成文  
兮理以為經舒翹于學校兮場屋之蜚英戶屨如雲兮  
于台乎明一鷄噓而翔兮謂竟至乎青冥風不競而退  
飛兮猿鶴與逢迎顧初心其如何兮是有命也而誰爭  
卒窮以死兮衣不周于斂形曾幾何時兮而晝哭之喪  
并一淺寄于坏土兮非重泉而奚局一孤露而凝塵兮

非同穴而奚寧家無擔石之儲兮眇寒脉之惻惻納納  
其宇宙兮茫茫其丘陵斧若堂不為過兮而蓬顆之難  
營痛死者之無歸兮生者何以為生感世道之不古兮  
義風颯其飄零使斯人而不得葬兮天乎豈其無情誰  
知天也有人兮亦在乎吾道之有盟余欲助而力不强  
兮其孤告行麥舟之心誰獨無兮當有如堯叟之於曼  
卿也

吳學志哀辭

伍山吳甫之子志學方垂髫時余見而器之試以一二語應聲荅可人意爾後每見必叩所學甚進磨以歲月則將有成年二十有闕不幸以暴疾卒天也非人所能與然所以喪其子而不使之死有憾則其責在父母世方淫於佛而山甫貧皆曰火之棄其餘于水足矣山甫慟既語之曰昔吳季子之子死于羸博之間歸其骨肉于土孔子以禮許之晏離之火妻灰子楊子雲

至為痛斥東漢佛教來荼毗二字始爛熳于天  
下我名教中人也忍使其子至于此極耶乃稱  
家營葬余往弔有觀焉因敬其父之知禮幸其  
子之不為異教所辱也而為之詞曰

人之生有死兮如夜之于晝壽無短長兮惟人之可否  
顏子之夭乃其命也夫壽如盜跖兮君子不謂之壽而  
既知所學兮方與日而俱新天固嗇其年兮予而乎奚  
咎魂升魄降兮骨肉必復于土名教雖嚴兮流俗易以



誘彼獨何心兮固為之繆述禮不有所主兮將死者莫  
正其邱首茲既得以歸全兮馬鬣以固封懼其鬼之餒  
兮且為之擇所以後四時之薦斯有以屬兮百年之墓  
斯有以守父母之心得兮而復何憾之有余哀而辭兮  
亦以慰而之父母

歲丙申良月嵩溪遺耄陳某八十三歲謨且書以授  
其父白之

挽辭

悼出童尚質二首

南山山最秀之子得其精年少文偏老身通道自亨得  
交空所蘊見義勇于行今日知無憾聲名一死生  
聚散幾匆匆真如醉夢中分雖甥舅異情寔弟兄同坐  
夜燈前雨評春扇底風傷心今已矣庭草泣秋蟲

弔單方菴墓

方菴居士死歸骨白雲根霜暑三年別風流萬古存月  
梁空夜夢宿草長春痕松底幽蘭發清香是夢魂

挽陳菊坡樞密卓二首

家學淵源遠公今德行科一純光白壁重望壓頽波職  
業居朝夕文章八石多平生何所似霜菊在秋坡

身到西樞府黃扉一蹴開急流知有退樂處在人間健  
領耆英社清標利欲關典刑今已矣風雨暗青山

挽董帥幹元龍二首

齋自杏林仙清開福最全獨醒偏醉客鰥宿似逃禪古  
貌堯民老風流晉世賢應門付兒輩花竹小壺天

向來相與處欲說淚先滂  
笑席平交等名鞭夙許長  
宦遊成離索歸見及康強  
如今果何日忍聽歌此章

本堂集卷八十九